

Ufficio Stampa della Provincia autonoma di Trento

Piazza Dante 15, 38122 Trento

Tel. 0461 494614 - Fax 0461 494615

uff.stampa@provincia.tn.it

COMUNICATO n. 319 del 11/02/2026

S hòt se gahòltn der Zòmmtreff van Stòttviarer va de Autonome Provinz va Trea't, van Vorarlberg ont va Bayern

Arge Alp, gem an nai'n impuls en alpinplòtz

[Mòcheno] De alpregionen, aa benn de sai' va mearer Stòttn, vinnen se vilvert vour en glaicha problem. Ver dòn, hòt men kirzlech klòfft, bail en trèff van "Iberschauer Arge Alp" - der orgl gamòcht van dersteller van lender as en doi moment de presidenz va de òrbetgamoas'chèft hom, de hom sa en vourder jor gahòp ont de barn sa en jor as kimp aa hom, Vorarlberg, Trentin ont Bayern - iber en de mossn ont en de projektn as en gòng sai'.

Abia birtschòftlege ont lebetn plòtz, de alpinregionen miasn an innovativ plòtz plaim ver de bèrkn ont en turismus, asou za plaim ònderst abia regionen, ober de miasn tschitzt kemmen abia platz van a guata lemqualitet. Der Alpinplòtz bart noat hom za hom an rèchtn vurm ver za gea' enkeing en hòrtn dinger as kemmenen vourstellt, abia as hòt kein der president van Vorarlberg ont der president van Arge Alp Markus Wallner, as hòt galòk sechen abia de ingern eirter meing se verpessern lai benn en de jungen kimp gem de moglechket za òrbetn. Iberhaup der networking en sektor va de u'lear ont a stòrcha zòmmbet en òlla de praich van alpnlem, schelletn mear paroaen de lait van alpnraum ver de zukunft. En trèff hom zòmmbet en netz der vicepresidente va de Autonome Provinz va Trea't, Achille Spinelli, ont, ver en Bayern, der Stòttminister Eric Beißwenger.

Energi ont jungen sai' de bichtestn dinger va de presidenz van Vorarlberg. En de mitt sa' de zboa' nain projektn Arge Alp "EigenAlp" ont "A regione mear raich va moglechketn ver kinder ont jungen", as kemmen gamòcht ver najeket van Vorarlberg. Der projekt as ist noch za trong envire der 'Arge Alp "European Talent School", regiart va de Baviera, ist a naiòrbet as kimp gamòcht òll jor ver za lònng kennen jungen as hom talent, s meing toalnehmen 48 jungen as kemmen van regionen Arge Alp. En programm va de Gamoas'chèft va òrbet kemmen organisiart zòmmtreffn as de temen va de energi ont van groasn vrèsser.

Arge Alp ist an òrbetgamoas'chèft inngabichen sait as de 12 van schanmikeal 1972 ka Mosern en Tirol, pet en zil za envire trong ont unterstizn de neatecher van alpine lander ont as enteressiart laischiar 26 milionen va lait. S sai toalnehmer va Arge Alp s Taitschlont pet en vrai stòtt va Baiern, Osterraich pet de Lander Vorarlberg, Tirol ont Solzburg, Balschlont pet de Autonome Provinzn va Poazn ont Trea't ont de Region Lombardia, de Schbaiz pet de Kanton Graubunden, Sankt Gallen ont Tessin. Men vinnt òlla de nochrichtn af de sait www.argealp.org.

Ibersetz gamòcht van Sprochtirl va de Tolgamoas'chèft Hoa Valzegu' ont Bersntol

(cdt)